

**Aningaasaqarnermut Ataatsimiititaliap suliaq nr. 01.31.06/08-00387 pillugu arfininngornermi ulloq 13. december 2008-mi aalajangiinera pillugu Naalakkersuisunut ilisimatitsineq**

(Naalakkersuisut ulloq 8. december 2008-mi ataatsimiinneranni imm. 2a)

**Kontomit pingaarnermi 75.86.22 Illoqarfinni akunnattumik angissusilinni eqqakkanik suujunnaarsitsisarneq, aningaasanik utertitsinissaq pillugu**

Naalakkersuisut **inassutigaat**,

kontomi pingaarnermi 75.86.22-mi, Illoqarfinni akunnattumik angissusilinni eqqakkanik suujunnaarsitsisarnermut tunngasumi suliassamut nr. 180.13.107 Ikuallaavik, Tasiilaq, aningaasaliissutit 10 mio. koruuninik ikillisinneqassasut

**Aningaasaqarnermut Ataatsimiititaliap oqaaseqaatai**

Tasiilami ikuallaasarfiup ilaata aningaasalersorneqarnissaanut 1999-imi 10 mio. kr.-inik immikkoortitsisoqarpoq. Suliaq ingerlateqqinneqarnani aningaasat immikkoortinneqartut taamanili Sanaartugassanut Iluarsagassanullu Aningaasaateqarfimmi uninngasuutigineqarput.

Tamanna tunngavigalugu suliaq tamanna unitsinneqassasoq ataatsimiititaliap AIS 09-mut, AIS 08-mut aamma AIS 07-imut isumaliutissiisutaani Aningaasaqarnermut Ataatsimiititaliamit kaammattuutigineqartarsimavoq.

Tamanna tunngavigalugu suliassap unitsinneqarnissaa Naalakkersuisunit qinnutigineqarpoq.

**Aningaasaqarnermut Ataatsimiititaliami ikinnerussuteqartoq Inuit Ataqtigiinneersoq isumaqarpoq** suliassap maannangaaq unitsinneqarnissaa pissusissamisunngitsoq. Tamatumunnga taarsiullugu Kangiata-Kitaani kommunerujussuaq nutaaq aningaasaliissutinik suliassamullu akisussaaffimmik tigusinissamut periarfissinneqartariaqarpoq, taamaalilluni Tasiilami eqqakkanik silaannarmi ikuallaasarneq avatangiisinut navianaateqartoq sapinngisamik piaartumik unitsinneqarsinnaaqullugu. Suliassap maanna unitsinneqarneratigut Tasiilami eqqassanik ikuallaasarnermi aaqqiissutissap atuutsinneqalernissaata tungaanut ukiut arlallit ingerlaratarsinnaapput.

**Aningaasaqarnermut Ataatsimiititaliami amerlanerussuteqartut Siumumeersut, Atassummeersut** Demokraatineersullu isumaqarput Naalakkersuisut inassuteqaataanut naapertuuttumik aalajangiinissamut tunngavissaqartoq.

**Aningaasaqarnermut Ataatsimiititaliap aalajangiinera**

Siuliani allassimasutut paasinnillutik Naalakkersuisut inassuteqaataat Aningaasaqarnermut Ataatsimiititaliami amerlanerussuteqartut **akuersissutigaat**.

Inussiarnersumik inuullaqqusillunga

Augusta Salling

Aningaasaqarnermut Ataatsimiititaliap siulittaasua